

Cussegl grond accepta dus concordats

Harmonisaziun da las prestaziuns da segirezza privatas e mesiras per impedir violenza

DA MARTIN CABALZAR

■ **Cun gronda maioritad ha il cussegl grond acceptà tant il concordat davart las prestaziuns da segirezza privatas sco er il concordat davart mesiras cunter la violenza a l'ocasiun d'arranschaments sportivs.** Sco quai ch'il

parsura da la cumissiun *Alessandro Della Vedova* ha constatà en l'introducziun da la debatta datti adina dapli interpresas privatas che sviluppan adina dapli activitads sin il sectur da la segirezza. Tar lur puschidas tutgan tranter auter era la surveglianza e la protecziun da persunas ed immobiglias, il servetsch d'urden tar arranschaments pli gronds, la surveglianza d'indrezs d'alarm, transports da segirezza e servetschs da detectivs. Adina dapli surpiglian talas interpresas privatas era l'incumbensa da reglar il traffic ni da patruglias da segirezza. Quel augment stertia cunzunt en connex cun la tendenza d'ina societad, dentant er en connex cun promtezza creschenta da violenza. Damai che l'activitad da talas interpresas privatas sa cruschia savens cun l'activitad da la polizia dovria ina clera cunfinaziun da las incumbensas. Plinavant stoppian interpresas privatas che fan amogna talas puschidas vegnir suttamessas ad ina controla statala. Entant che differents chantuns disponian gia da talas reglamentaziuns manchian talas en il Grischun. Per quel motiv vul il Grischun sa colliar en l'avegnir cun ulteriurs 17 chantuns per garantir ina soluziun armonisada.



Il schef dal departament da giustia e segirezza cuss. gov. Christian Rathgeb ha motivà en il cussegl grond la necessitad d'acceptar il concordat davart las prestaziuns da segirezza privatas e davart las mesiras per impedir violenza ad occurrenz da sport. FOTO Y. BÜRKLI

Controllar meglier las interpresas da segirezza privatas

Per pudair garantir la segirezza e la qualità dals servetschs vul il concordat controllar meglier questas puschidas. en l'avegnir. Uschia ston interpresas privatas avair ina permissiun per lur activitads.

Premessa per questa permissiun è ina scolaziun e perfecziun adequata.

Ils deputads *Andy Kollegger* (pd Cuir), *Angela Casanova* (pld Razén) e *Michael Pfäffli* (pld Engiadina olta) averteschan da betg reglamentar memia fitg tals servetschs per evitar ina gronda burocracia.

Aurelio Casanova (pcd Foppa) ed *Adrian Steiger* (pld Trin) laudan las experienzas fatgs cun ina collavuraziun tranter la polizia e las organizaziun privatas da segirezza. Deputà *Andri Perl* (ps Cuir) avertescha da betg stravagar cun mesiras da segirezza.

Cussegliev guvernativ *Christian Rathgeb* (pld) ha punctuà ch'i mondia per proteger la populaziun d'interpresas nunqualifitgadas. Cun il nov reglament èsi obligatoric per ils servetschs privats da scolar lur persunal. Vitiers vegnan definids ils cunfins tranter las incumbensas da la polizia e las firmas privatas. Il Grischun entra en il concordat sco 10avel chantun. Il reglament duai ir en vigor il 2017. Il cussegl ha la finala approvà quest concordat cun 95 cunter 14 vuschs.

Impedir violenza tar arranschaments da sport

La conferenza dals directurs da giustia e polizia han deliberà in concordat che preveda mesiras polizialas preventivas per evitar cumpurtaments violents sco era per eruir e per cumbatter a temp la violenza a chaschun d'occurrenz da sport. Gieus da ballape u da hockey da la pli auta liga dovran en l'avegnir ina permissiun dal chantun. Quai preveda il concordat cunter la violenza ad occurrenz da sport ch'il cussegl grond ha approvà cun gronda maioritad.

Tar mintga permissiun po il chantun uschia pretender ulteriuras mesiras da segirtad. En il Grischun è sulettamain il Club da hockey da Tavau pertutgà da las mesiras da quest concordat. Cunquai ch'ìls fans dal HCD na chaschunian betg gronds problems possia il chantun dentant dar ina permissiun per l'entira stagiun, uschia il cussegliev guvernativ Christian Rathgeb.